

“O FILOSOFO DE TAMARICA”

A traballadora, patriótica e entusiasta Editorial *Lar*, mándanos no seu número 27, unha noveliña, do xoven e perspicaz humorista Xulián M. Magariños Negreira, chamada «O filósofo de Tamarica».

Fai xa algún tempo que nós puxemos unha decidida fe neste rapaz que ven a ser unha firme promesa para as letras galegas no campo do humorismo. Precisamente no campo máis fecundo para a nosa futura literatura.

Eu coído que Xulián M. Magariños Negreira, pode darnos unha firma de ouro valor e de sólido prestixio si se consagra por enteiro, a produción literaria nise senso que é a súa característica, a súa tónica: o humorismo.

«O Kalibera 30 H. P.», publicado fai pouco tempo por esta Editorial amosándonos a o amigo Magariños, como unha firma de positivo mérito, e a demostración destoncias, afirmáse agora no «Filósofo de Tamarica» que ven a ser unha continuación xa decida do escritor afirmado no vieiro que o ha levar a o cume da valoración definitiva.

Ten Magariños Negreira unhas dotes escicionaes para a conservación e unhas virtudes depuradas para maxicar incidencias e chuscadas de moito donaire e fina gracia.

Non é o chistoso burdo e barballoca que di choqueiradas repunantes sinon que é o contador, o narrador de anécdotas sinxelas, esquisitas, agradabres e graciosas.

Non vai o chiste procaz, insulso, brutal e deprimente, sinon que busca o efecto da verba, o choque da frase que producen o contraste belido e armoñoso para facer rir e divertir a o leitor.

Da unha gracia orixinal, limpa, elegante a súa prosa e sementa no regazo da trama novelesca xenialidades prenas de orixinalidá, de novidade, de bon gusto. O incidente, a argumentación, o tecido aneidótico son na obra novelesca de iste rapaz conspicuo e avivado, unha cualidá, primordial no senso da fermosura literaria, da beleza artística.

Magariños Negreira é o tipo do observador galego, por antonomasia, a encarnación de ise noso espírito burlón e orixinal, que nos distingue dos demais pobos ibéricos para nos acusar con un temperamento, con un carater, con unha psicología completamente *sui generis*.

Será iste rapaz tan apromado, serio e serenado, un dos nosos principais humoristas, si é que persiste en cultivar ista cualidá que informa o seu temperamento e acentúa a súa sensibilidade.

Para a Editorial *Lar* vaia un novo eloxio, polo esforzo que realiza a o traballar con entusiasmo, con fe, nista obra de esaltación de valores novos, a o dar a luz firmas que mañán serán sillares de sólida consistenza, que vaise consolidando o tempo da nosa cultura.

XUAN XESUS GONZALEZ.